

एह आकाशवाणी जम्मू ऐ, संजा खबरें च तुंदा सुआगत, पैहलें खास-खास खबरें कन्नै में पूजा वजीर।

<><><><><><>

Headlines

1. जिला सुशासन सूचकांक दे 5में संस्करण च जम्मू जिले नै अक्वल थाहर हासल कीती ऐ, पुलवामा दुई ते साम्बा त्री थाहर पर रेआ। कठुआ जिला सबने शा हेठले नम्बरें पर रेहा ऐ।
2. जम्मू च मनाए गेदे अंतरराष्ट्री वन दिवस च मंत्री जावेद अहमद राणा होरें जंगलें दे संरक्षण लेई सांझे जत्ने दा आह्वान कीता।
3. औंदी अमरनाथ जातरा शा पैहले जम्मू-कश्मीर दी माउंटेन रेस्क्यू टीम, एन.डी.आर.एफ ते एस.डी.आर.एफ दे जोआने लेई 15 दिने दे बशेष सिखलाई कार्जक्रम दा आयोजन करा'रदी ऐ।
4. मेगा आधार लाजमी बायोमीट्रिक अपडेट अभियान 2.0 पूरे जम्मू-कश्मीर च शुरू कीता गेआ।
5. जम्मू-कश्मीर दा सैलसफा विभाग दशहरा ग्राउंड, गांधी नगर जम्मू च 26 थमां 28 मार्च 2026 तोड़ी जम्मू मैराथॉन एक्सपो दा सरिस्ता करने जा'रदा ऐ।

<><><><><><>

DGGI-5.0

जम्मू-कश्मीर सरकार नै जिला सुशासन सूचकांक 5मां संस्करण जारी कीता ऐ, जेहदे च माली बरे 2024-25 लेई शासन दे प्रमुख मापदंडें पर सबने 20एं जिलें दे प्रदर्शन दा मूल्यांकन कीता गेआ ऐ। इस प्रदर्शन दा मूल्यांकन प्रदेश दी अर्थबवस्था च महत्वपूर्ण भूमिका आले 10एं खेतरें दे आधार पर कीता गेआ ऐ ते जिलें गी 58 संकेतकें पर हासल नम्बरें दे आधार पर रैंकिंग दिती गई ऐ। जिला जम्मू 7 अशारिया 0552 दे कुल अंक कन्नै समग्र रैंकिंग च अक्वल आया ऐ जिसलें के जिला कठुआ 5. 5826 दे अंक कन्नै सबने शा हेठ रेआ ऐ। तोआई, पुलवामा 6. 7655 अंक कन्नै दुई थाह ते साम्बा जिला त्रीs थाह पर रेआ ऐ।

<><><><><><>

International Day Forests

जम्मू-कश्मीर जंगलात मैहकमे नै अज्ज नरवाल च अंतरराष्ट्री जंगलात दिवस मनाया जित्थे जंगलात ते पर्यावरण मंत्री जावेद अहमद राणा होर मुख परौहने दे तौरा पर शामिल होए। मंत्री राणा होरें शहीदें दे स्मारक पर श्रद्धांजलि अर्पित कीती ते मैहकमे दे सखेत्रुं गी पुरस्कार बी दिते। एहदे अलावा मंत्री होरें इस मौके पर रस्मी तौरा पर बूहटे लाने दी अगुवाई बी कीती। किट्ठ गी संबोधित करदे होई मंत्री होरें जंगलें दे महत्व पर लो पाई ते इन्डे संरक्षण च समुदायिक भागीदारी दा आग्रह कीता। मगरा मीडिया कर्मिं कन्नै गल्लबात करदे होई मंत्री जावेद अहमद राणा होरें आखेआ

<><><><><><>

Training NDRF/SDRF

औंदी सालाना अमरनाथ जातरा शा पैहले जम्मू-कश्मीर दी माउंटेन रेस्क्यू टीम, राष्ट्री आपदा मोचन बल ते राज्य आपदा मोचन बल दे जोआनें लेई 15एं दिनें दे बशेष सिखलाई कार्यक्रम दा सरिस्ता करा'रदी ऐ। एह सिखलाई जम्मू खिते दे प्हाड़ी इलाकें च लोआई जा करदी ऐ जित्थे प्रतिभागिं गी आपदा आली स्थिति थमां निब्वइने आस्तें बचा तकनीकें बारें सिखलाई दिती जा'रदी ऐ। एह पैहलकदमी पिछले बरे होई दी कुदरती करोपियें दे मददेनजर कीती जा'रदी ऐ तां जे भविक्ख च इस चाल्ली दी कुसै बी माड़ी घटना थमां निब्वइने लेई तैयारियें गी मजबूत कीता जाई सकें। माउंटेन रेस्क्यू टीम दे इंचार्ज इंस्पेक्टर राम सिंह सलाथिया होरें इस बारें होर जानकारी दिंदे होई आखेआ

<><><><><><>

Mission YUVA

नौजवानें च स्वरोजगार ते उद्यमशीलता गी बढ़ावा देने लेई जिला रोजगार ते परामर्श केंद्र नै उधमपुर जिला प्रशासन दे सहयोग कन्नै मिशन युवा दे तैहत इक रोजा उद्यमिता ते जागरूकता मेले दा सरिस्ता कीता। इस पैहलकदमी दा मकसद मकामी नौजवानें गी जानकारी देना ऐ तां जे ओह सरकार आसेआ प्रायोजित बक्ख-बक्ख उद्यमिता विकास कार्यक्रमें राहें उपलब्ध कराए जाने आले स्वरोजगार दे मौकें दा पता लाई सकन ते उंदा लाह हासल करी सकन। उधमपुर दे डिप्टी कमिश्नर मिंगा शेरपा होरें इस कार्यक्रम च मुख परौहने दे तौरा पर शिरकत कीती। रोजगार केंद्र दियां सहायक निदेशक प्रियंका गुप्ता ते होर केई जिला अधिकारी बी इस मौके पर उत्थे मजूद हे। पत्रकारें कन्नै गल्ल करदे होई डी.सी उधमपुर होरें आखेआ

तोआई, चनैनी थमां नौकरी तुप्पा' रदे सौरव दा आखना हा

<><><><><><>

ते हुन बाकि दिए खबरें कन्नै पूजा वजीर।

Aadhar Biometric Drive

जम्मू-कश्मीर च भारतीय विशेष पंछान प्राधिकरण (UIDAI) नै सूचना प्रौद्योगिकी विभाग ते समग्र शिक्षा दे सैहयोग कन्नै मेगा आधार लाजमी बायोमेट्रिक अपडेट अभियान 2.0 शुरु कीता ऐ। आकाशवाणी जम्मू संवाददाता दे मुजब स्याले आहले जोन दे स्कूलें च एह अभियान शुरु होई गेआ ऐ ते इक अप्रैल थमां सोए आहली जोन दे स्कूलें च बी शुरु होई जाग। एहदे तैहत 2 जहार 382 स्कूलें गी कवर कीता जाग ते 2 लक्ख शा मते विद्यार्थियें गी फायदा पुज्जोग। इस पैहलकमदी दा मकसद बक्ख-बक्ख सरकारी योजनाएं- वजीफें ते होरनें सेवाएं दे तैहत लाऽ हासल करदे बेल्लै बिना रुकावट प्रमाणीकरण गी यकीनी बनाना ऐ। अभिभावकें गी गुजारिश कीती गई ऐ जे ओह अपडेट कार्यक्रम लेई स्कूलें दे सम्पर्क च रौहन।



Jammu Marathon Expo

पर्यटन विभाग जम्मू-कश्मीर 26 थमां 28 मार्च 2026 तोड़ी जम्मू मैराथॉन एक्सपो आयोजित करने जा'रदा ऐ। एह एक्सपो दशहरा ग्राउंड गांधी नगर च होने जा' रदा ऐ जेड़ा के जम्मू मैराथॉन कोला पैहले आयोजित कीता जा'रदा ऐ। जम्मू मैराथॉन 29 मार्च 2026 गी होनी ऐ। एह एक्सपो रोमांचक अनुभव होग जेदे च मैराथॉन बिब, टी-शर्ट बंडियां जाडन, हास्य कार्यक्रम, रिवायती लोक नृत्य, हास्य कार्यक्रम, रिवायती लोकनृत्य, लाइव फूड स्टाल ते मकामी कला ते हस्तकला दे स्टाल बी लाए जाडन। इक सोशल मीडिया पोस्ट च विभाग नै लोकें गी बदी-चढ़िये एहदे च हिस्सा लैने आस्तै आखेआ ऐ।



Passport Camp-Rajouri

अज्ज डी.सी दफ्तर परिसर, रजौरी च 3 ध्याड़े दे मोबाइल पासपोर्ट वैन कैंप दी शुरुआत कीती गई जेड़ा 26 मार्च 2026 तोड़ी चलोग। डी.सी रजौरी अभिशेक शर्मा होरें कैंप दा शुभारम्भ कीता। इस मौके विदेशी मामले सरबंधत मंत्रालय दे ओ.एस.डी सुनील खार बी मौजूद हे। इस कैंप दा सरिस्ता क्षेत्रीय पासपोर्ट दफ्तर जम्मू ते जिला प्रशासन रजौरी तरफा रलिए कीता गेआ हा, जेदा मकसद लोकें गी घरें तोड़ी पासपोर्ट सेवा उपलब्ध कराना ऐ। कैंप दरान लोकें गी मौके पर गै पासपोर्ट सेवा दिती। मती जानकारी दिंदे होई डी.सी रजौरी



KVK-Poonch

पुंछ दे कृषि विज्ञान केंद्र नै सफलता कन्ने 13मीं साइंटिफिक एडवाइजरी कमेटी दी बैठक दा सरिस्ता कीता जेदे च विशेषज्ञ, हितधारक किट्ठे होए तां जे विकास दी समीक्षा ते भविक्ख च जिले आस्तै राईबाई सरबंधत पहलकदमिं दी योजना बनाई जाई सकै। बैठक दरान गतिविधिं दे विस्तार बारै तफसीली चर्चा कीती गई। करोआए गेदे प्रशिक्षण कार्यक्रमें बारै बी गल्लबात होई। कमेटी नै करसानें तोड़ी पुज्ज बदाने आहले कार्जक्रमें गी मजबूत करने पर जोर पाया ते कन्ने गै राईबाई दे नमें तौर-तरीके अपनाने गी बी जरूरी दस्सेआ। उत्पादन ते जिले दे राईबाई क्षेत्र च टिकाउपन दे बाद्दे आस्तै बी महत्वपूर्ण फैसले लैते गए। स्कॉस्ट जम्मू दे डायरेक्टर एक्सटेंशन डॉ. अमरीश वैद होरें जानकारी सांझा करदे होई आखेआ

<><><><><><>

Badminton Tourney-Udh.

चार रोजा 'Den of Shuttlers' बैडमिंटन टूर्नामेंट दे 7में संस्करण दा सरिस्ता जिला युवा सेवा ते खेड् विभाग आसेआ नशामुक्त अभियान तैहत उधमपुर च कीता गेआ। एहदा उद्घाटन एस.एस.पी उधमपुर, अमोद अशोक नागपुरे होरें कीता जेडे इस मौके मुख परौहने हे। एस.पी उधमपुर संदीप भट्ट ते एस.एच.ओ उधमपुर अभिजीत सरोही होर बी मानजोग परौहने दे तौर पर इस मौके मजूद हे। एह आयोजन मिनी स्टेडियम बैडमिंटन हॉल च कीता गेआ जेदे च 300 खडारी हिस्सा लै' रदे न। बक्ख-बक्ख श्रेणिं च होने आहले मुकाबले खेड् च रूझान दा बाद्दा करडन। एस.एस.पी उधमपुर अमोद अशोक नागपुरे होरें इस मौके पर आखेआ

<><><><><><>

News Read By : Abhilasha Sharma and Pooja Wazir

Composed by : Varinder Sharma

Editor :

Kunal Shrivatsa